

SOTERIOLOGY

(Doctrine of Salvation)

Paominlen Kipgen (PK), M.Th

THUMAKAI

Soteriology kitihi Greek paova, 'Soter' tichu, 'Huhhingpu' tia kona hung kiladoh, 'Soteria' iti teng 'huhhingna' ti'a hung kimang; chuleh 'logos' hichu 'thu/kihilna' tina ahin, hiche thucheng ni'a kon hung kiladoh: Huhhingna chung changa kihilna tina ahi.

Adam le Eve chu Pathen thupeh bang bang chun anaum jinglhon hen hileh huhhingna kitihi ana ngaikhoh louhel ding, chuleh Pathen angsunga chu umjing lhonding, atonsotna umjing ding anahi lhone. Ahin thumanlou chonsetna jehchun mihem hi Pathen'a konin anavah mang tan, hijeh'a hin Pathen lunghana chun mihemte chung a vai analotan ahi (Gen. 3; Rom. 3-5).

Ahin Pathen'in Ama limle mela anasemsa mihemte chu amoh manthah jengdiu aphilou jehchun, akihuhhing theina diu tohgong anabolpeh'in ahi (Gen. 3:15, 21). Chuleh mihemin chonsetna jeh'a Pathen limle mel ana suhmang sahsao, chule Athena le achonphatna ana mansah sao chu Christa tahsana'a kon akinung mukit theina dinga Pathen'in mihem te huhhing channa ding lampi ahingon ahi.

BUNG – 1

THULHUN LUIJA HUHHINGNA

1. O.T A HUHHINGNA KIMANDAN

Thulhunlui phatlai chun huhhingna kitihi tahsalam dola huhhingna, huhdohna chuleh sochatna, lhadohna, huhdohna, ahilouleh tahsa thina theija kona huhhingna thudol jengin ana kimangin ahi (Gen. 12:12; 50:20; Ex. 1:22; Deut. 20:4; Ezk. 13:18; Mtt. 8:25; 14:30).

2. O.T PHATLAJA HUHHINGNA TOHGON

Pathen'in Adam le Eve chu athu amanle amanlou patepnan Eden hon sunga honlei lhou dingle vetup dingchun anakoi lhonin ahi (Gen.2:15-17). Ahin, hiche patepna'a chun Adam le Eve chu alhing joulhon tapon, satan lhez patepna joh achun alhulhon tan ahi (Gen. 3). Hijeh chun amani chonsetna jeh chun achilhah mihemte jouse chung a Pathen gaosapna chu ahung lhungsoh tan ahi (Gen. 3:17-19; Rom. 3:23; 6:23). Ahin Pathen'in Adam le Eve Eden hona konna anodoh chun huhhingna ding thucheng khat toh anodoh tha lhonin ahi (Gen. 3:15, 21-23).

Hiche jouvin Pathen'in mihemte chu sele pha hetna'a Pathen ahedoh theina diu thaneina anapen, ahin amahon hichu Pathen hetnan anamang deh pouve. Noah le a'insung mite tilousen hiche sele pha hetna hi anamang pouvin, nopchon nan ana mangun, chuin twisanglet'in suhmangin aumgam taove. Hinlah Noah le a'insungmite vang chun sochatnan ana mangun ahi.

Twisanglet jou chun, Noah chapa Ham chapa Cush, Cush chapa Nimrod lamkai na noijah vanvum phading insang khat ahinsah phatnun, Pathen'in jong vannoi leiset pumpi paokhatseh ahinao chu ahin suhcheh peh taovin ahile vannoi leiset muntinah ahung kithe thang taovin ahi (Gen. 11:6-10; 11:1-9).

Chujou kitchun, Pathen'in Abraham chu ama mintheng kiphondohna dingin achenna gam leiset adallah'a gamthah akouna mun ahinjot dingin akoudoh tan ahi (Gen. 12). Abraham'in Pathen kouna asana, Pathen toh akitepna lhon phabep pi amu nungin musoh louvin ana thitan; ahin Pathen'in Abraham toh akitepna lhon chu atu achate, achilhahte chungga ahin geldoh jingin asumilpoi.

Jacob phat chun, Canaan gam kel lhah jeh'in Egypt'a puhsui ja chedingin achate pasal 10 chu asolin, achapa Joseph Egypt gama vaipo'a anapan jalchun apau Jacob changeijin aga chenlut louvin, ajonan Joseph hephalou mikhatnin lengvai ahinpoh phatchun ahung soh changden taovin ahi (Gen. 45:28-50).

Hiche asoh channa munuva kona gapuidoh dinghin Pathen'in Mose chu asolpeh'un, agapuidoh sah taovin ahi. Mosen agapuidoh jou Canaan gam alut ding konun Joshuan Jordan vadung agalkai pi taovin, Canaan gamah achenglut taovin ahi. Chuti'a Canaan gam alhun jounung jengun jong Pathen chu asumil matchet uvin, Pathen'in avel velin gentile te khutnoija asoh chansah peh'un, chujongleh ahuhdoh matchet uvin ahi.

Chuleh Pathen dan thupéh ho nitjou talouva chonset jeh'a gamtina kithe cheh sohchangho puidoh dinga, alengvai podiuva Pathen'in Christa a'Messiah'u ahin solpeh kit jengun jong deilouvin thing cross'a ana khenbeh kit taovin ahi.

BUNG – 2

THULHUN THAH'A HUHHINGNA

1. N.T'A HUHHINGNA KIMANDAN

Huhhingna kiti thuchenghi NT'a Lhagaova huhhingna thudol jengin akiseijin ahi. Ajehchu mihem hi Eden'a patna satan khut noija hung sohchangsa peh ahitan, hijeh'a chu Christa thisan le lhagaova lhatdoh ngaija ahivue. Chutichun chonset man chu thina ahung hitan, ahin Pathen thil thonpeh Christa tahsan vangin tonsot hinna mihemin aneikit thei taovin ahi (Rom. 6:23; 3:23).

Ahin hiche chonset man kitihi Pathen'in satan khutna apéh'a achohdoh ahipon, mi chonse khat'in Pathen thil thonpeh Christa chu ahin tahsan teng chule Pathen'in jong achapa thisana chu asop thenga, lhagaova chu mahor anam khuma, Keija mong ahitai ti'a melchihna abol ahi (Eph. 2:5; 4:30; Rom. 8:14; 1 Cor. 6:19-20).

2. N.T. PHATLAIJA HUHHINGNA TOHGON

Tu thulhun thah'a huhhingna tohgón hi achom beh'in akikhelin ahi. Hiche huhhingna kiti hi tahsa lam ahitapon, lhagaolam joh ahitai. Hiche phat sunga huhhingna kitihi Christa tahsan jala Lhagao Thenga kona pentahna ahin, tohphat vanga hilou, lungset man'a huhhingna chu ahi (Eph. 2:8-9).

Chuleh hiche Christa tahsanho chu Ama athen banga thengsela boh behlou hela umdinga lhatdoh ahitaove (1 Pet. 1:15,16; 1 Thess. 4:7). Hiche huhhingna phat kothi mithengte lahtou (rapture) chan geija ding ahi.

BUNG – 3 HUHHINGNA CHUNG CHANGA PATHEN'ATOH

DOCTRINE OF PREDESTINATION (Het masat chung changa kithuhilna)

Christiante huhhing channa hi mihem boltheina leh natoh vang hilou, Pathen tonsotna ana tohgon chu ahi. Predestination hi fore-ordination (gotmasat) - leiset chung a thilsoh jousehi Pathen lungdeilam ahi – titoh kibanglou ahi. Hetmasat tihin mihem lhun nading (destiny) aseina ahin, gotmasat hin leiset thuto kisai aseina ahijin ahi. Calvin'in het masat hi Pathen lunsetna'a ami huhhingna lampanga amangchan, hiche thuhil hi Pathen milungsetna bulpi ahi atin aseijin ahi. Aman hiche thuhil aphatchom na aseina'a

- i. Pathen milungset manbei ahi hetnading.
- ii. Pathen loupi sah nading.
- iii. Eiho kineosah je ikihil nadiu.

Hiche thuhil chungchang thuhi Bible'a kiphondohna dungjuija bou sei angaijin ahi. Ikichih theina dinguva hetding chu:

- i. Bible sunga kiphondohna (Biblical revelation) sunga hi umden (remain) ding angaijin
- ii. Hiche thuhil hi nahsah louva bollou ding ahi.

1. BIBLE DUNGJUIHI HICHE THU'A KIHILNA (Biblical Basis for this Doctrine)

(Gen. 18:19; Amos. 3:2; Acts. 2:23; Rom. 8:29; 9:11; 11:2,5; 1 Cor. 8:3; Gal. 4:9; Eph. 1:4,9,11; 2 Thess. 2:13; 2 Tim. 1:9; 2:19; 1 Pet. 1:2).

Pathen'in ahet masat (foreknowledge) tihin, Pathen'in ahung lhung loulai ahet atina ahi. Hiche dungjui hin **Calvin** thuhil chu 'double predestination' (alangni'a het masat) ahiteijin, Hichu: Pathen'in aphalam/ahing dinga mi alhenin (positive election) chule aphalou/athidinga jong alhenge (reprobation) ti ahi. Kimkhat chu Pathen'in alungsetna'a alhen chung a kingai ahijeng vangin, adangse chu Pathen'in adalhan achonset naova aumjing nalaijuve; ajehchu leiset chung a thilsoh jouse hi Pathen thusahlou, hetmasat lou, gotmasat lou umlou ahi. Hijeh'a chu Pathen'in kimkhat chu huhhing chang dinga alhenleh, adang themmo chang dinga adalhah jong aume tina ahin, hijeh chun 'double predestination' tihin Pathen'in alhen leh adalhah atina ahi.

2. LHEN MASAT (Predestination) CHUNGCHANG'A LUNGGEL JATCHOM CHOMHO

Masanga pat Theologian ho hiche Pathen milhen chungchanga thuhil hin anakinel jingun, Geldan jat 3 aume.

- i. *Supralapsarianism*: Hiche thuhil dungjui hin, Pathen milhen hin:
 - a. Kimkhat lhatdoh dingleh adang themmo chang ding;
 - b. Huhhingna changdingle themmona chang dinga ani'a sem (create);
 - c. Ani'a chu chonsetna lhathei;
 - d. Huhhingna hi akilhengdoh ho dinga bou hiding.

Hilajja hin hetmasat hi atilla pat ana kigong ahitan, chonsetna lhahjou ahipoi.

ii. *Infralapsarianism*: Hiche thuhil dungjuihin:

- a. Pathen phatsah'a mihem kitem;
- b. Chonsetna lhathei ding;
- c. Kimkhat huhhinga umding, adang themmo chang ding;
- d. Huhhingna hi akilhengdoh ho dinga bou hija ahi.

iii. *Sublapsarianism*: Hiche thuhil dungjuihin:

- a. Pathen phatsah'a mihem kitem;
- b. Mihem chonsetna lha dinga phatsah;
- c. Huhhing hi mijouse dinga bulhingset ahi.
- d. Kimkhat chu hiche huhhingna chang dinga lhendoh.

3. PREDESTINATION THUHIL CHUNGCHANGA HETDING HO:

i. Pathen'in bou koiho chu lhen lah'a chu jaoham ti ahei.

ii. Hiche thuhil hin huhhing channa ding hi Pathen lungset vangseh ahin, mihem boltheina vang ahipoi.

iii. Hiche thuhil hin mihem ten kipana thupha alhangsap dingu leh huhhing chang dinga akigotna diu ima asulhom (reduce) dehpoi. Pathen'in atoh gon hi mihemho natoh jala kon abulhit ding ahi (through human agencies)

iv. Hiche thuhil hin Pathen'in huhhingna hi mijouse kibang chetna achan nadinga ino nadiu lampi aumpoi. Hiche hi Calvin thuhil ahi. Pathen'in huhhingna achan dan hi akibang pon, ahin adihlou (unfair) ahidehpoi.

v. Pathen milhen nahi sunglama ahilouleh dihtah'a kikouna'a kon akiphong doh'e. Akilhengho bou chu hiche pentahna hi changthei dingu ahi.

vi. Hiche thuhil hin mitheng/mipengthah ho huhhing channa ding (perseverance of saint) jong ahopthan, akilhengdoh hochu iti nama jongleh achaina leh huhhinga umthou thou ding ahi. Pathen'in amilhen ho chu iti jong leu avenbit/huhhingna achan thouthou ding ahi – Mipeng thah chu ihung tijong leh akhona leh huhhinga umthou thouding ahi. Pentah na amangtheipoi - tina ahi.

vii. Akilhengho chun akilheng ahive ti ahe'un ahi. Ajehchu amahon Pathen lamcha hina lhagao (spirit of adoption) aneijun, chuleh Pathen chu apa'u ahi ti alungsung giltah uva anei jun, huhhing kihetchetna aneijun ahi.

viii. Pathen milhena na hi Christa jaolouvin alhung ngaipoi. Eiho eiho ihijeh uva lhen ihipouvin, Christa jala bou lhen ihive. Pathen milhen jehchu Christa tahsa'a ikibuto theina dingu ahi. Christa toh kipum khat jala bou lhen (election) hi chamkim thei ahi.

4. ARMINIUS THUHIL DUNGJUIJA PREDESTINATION

i. Pathen thusah masapen chu Achapa vannoi huhhing dinga hinsol ding hi ahi.

ii. Anina chu Aman alunghei jouse leh Christa tahsan jouse ahuhhing ding, atahsanlou jouse leh asanglou jouse chu adalah ding ahi.

iii. Aman alungsetna hi alungtup molso nadingin amangin, mijouse chungga lungsetna achanin hiche chun mihem chamlhatna lunggel chu asemphat kitna, amahon akilhen dinguva akoi ahi.

iv. Ahin Pathen'in koichun atahsana koichun atahsan louding ham ahe masai.

5. ARMINIUS'IN HUHHING NACHUNGA POINT 5 APEH HO (Armineans's 5 points called remonstrant)

i. **Conditional election** – thilkhat jeh'a kilheng; hiche thilkhat (condition) chu tahsan ahi. (Calvinin vang kilhen hi ajeh aumpoi; Unconditional ahi ati.

ii. **Universal atonement** – Christa lhatdohna natoh hi mijouse ding ahin, ahin ngaidamna hi alungheiho ding bou ahi. Langkhatna seidingin, Universal atonement tihin lhatdohna natoh hi mijouse dinga bulhing ahin, ahi'a alung heija Christa tahsanho bou huhhinga umding atina ahi. (Alangkhatna Universalism tihin, Christa mingailutna chu bulhing set ahijala mijouse chu Christa kisan hihjongleh achainaleh huhhinga umding ahi atina ahi.) Calvinin vang Limited atonement – lhatdama natoh hi mijouse ding hilou – ti atahsane.

iii. **Natural inability** – Lhagao Theng natoh louvin koimachan napha atong theipon, kipana thupha jong asang theipoi. Hijehchun Kipana thupha hi Pathen mingailutna jala bou isantheiju ahi. (Hiche chungga hin Calvin leh Augustine akibange).

iv. **Resistable Grace**: Pathen milungsetna hi huhhing ichan nadinguva poimotah ahin, ahin hiche hi ijahda/pampai theiju leh inoplou theiju ahi.

v. Conditional perseverance of believers: Hiche hi tahsan ho bitlouna ahin, huhhingna (Penthahna) hi akimansah theije. Arminieus amatah'in hiche thuhil hi athi kahsen agel lha theipon, ahin athi nunga asejui hon ahin hilpatnu ahi. Mihem khatchun Pathen milungsetna huhhing channa chu atuhchah'a, phatseh'a Christa'a aumjing lou leh huhhingna'a kon lhamang thei ahi.

6. PREDESTINATION CHUNGCHANGA CALVIN THUHIL

Chungga kisei Arminius thuhil toh kikaln, Synod of Dorf (1618-1619) chun anoiija thugol cheng Calvin thuhil hi ahin podoh'un, achom lamin TULIP asah'ui.

i. T = Total depravity (Mihem jouse mangthah'a, lamdih louva che ahitaove).

ii. U = Unconditional Election (Eiho'a kona imacha ngailouva kilheng ihuive).

iii. L = Limited Atonement (Lhatdamna natoh hi mijouse ding ahipoi).

iv. I = Irresistable grace (Pathen lungset chandinghi aki ada teitei theipoi).

v. P = Perseverance of the Saint (Huhhingna/Penthah hi akimansah theipoi).

7. KARL BARTH THUHIL DUNGJUIJA HETMASAT (Karl Barth's understanding of predestination)

Predestination chung changa ama thuhil hi Christocentric (Christa alailung hisah/Christa'a kingam) ahi. Ama Calvin Predestination ademin, jatchom beh'in ahilchene. Aman hiche thuhil hi Christa lhatdamna natoh hetchetna'a kon hetding ahi atin, athuhil lah'a thupi pen khatchu Pathen milhen thudola tonsotna alungtup chu Achapa Jesu Christa alhending hi ahi, ati. Chapa lhen (elect) atihin vannoti mihem jousehi Chapa'a chu lhen hitha ahiuve tina ahi. Pathen leh mihem ani'a ahito lhona Christa chu akilheng bouseh hilouva alhenga Pathen jong hija ahi. Hijeh'a chu Aman mihemkhat hunghe'a lhen ahithe'i nadinga Pathen lungdei chu kipahtah'a atoh ahi.

Double predestination ahilchet son na'a, Christan thina chu alhena, mihemte dinga thina chu aman akilhen ahi. Hijeh'a chu Christa'a chu mijouse amahon akihetdoh masanguva pat thina'a kon hinna'a lahlut ahitaove.

Karl Barth's theory boina chu: kipana thupha hi mihon tonsotna pat thutah/adihtah chu ahetha ding maimai juva seiphongle ding ahi tihi ahitan, michonse ho sunglama kon kikhelna angailou abangtai. Hijeh chun ama thuhil hin universalism lang apuilut theije.

BUNG – 4

PATHEN MIKOU (God's Call)

Leiset chung mihemte jouse hi lamchom cheh'a chonsetna'a alha sohkeijun; chonsetna kilah naho chu: kiloikhomna leh alhangpi'a thutah louna ahin, chule ama le ama kingailutna asohdoh gamtan ahi. Hijeh'a chu Rome. 3:23 nan, "Mijouse chu chonse ahitan, Pathen loupina chu changlela ahiuve" ati ahi.

Ahin hitobanga mihem chonsetna le lhahsamna chung jenga jonghin Pathen'in Huhhinga aumna ding lampi ahin gongin, hinna thah le kipana anei theina dinguvun Achapa ahin sole. Chule Ama lama puilutna ngaidamna leh hinkho thah peh ihi theina dinguva Lhagao Thenga isunguva na atoh jing ahi. Eihon idin munu tijat umtah ikihet doh masangu leh semphat thei ahi ti ihet masangun Pathen joh'in akal ahinsong masan, huhhing ichan theina dingun na ahintong masan ahi (John. 6:44). Hiti'a chu Pathen'in eihinkou tenguleh isanuva idonbut thei nadinguva na atoh ahi.

Kou kiti hi mihem khat Pathen hephalou, geljong geldoh phalou khat kidangtah'a athujah'a kon Pathen'in ipi aseiham, iti adonbut dingham ahin hetna Pathen toh ahung kimaito chu ahi. Hichehi alhangpi'a kouna hilou, changvala athumang tah'a munkhatna dinga kou ahi. Pathen'in Abraham chu aheth louna muna chedingin akouve. Amos chu jalhang kitahlouna chung themgao din akouve. Ezekiel chu dingdoh/kipandoh dingin akouve. Akikouho chun adonbutnun, Lhagao Theng thanei na'a adonbutnu ahi tin Ezek. 2:2 na'a akimui. Ezekiel chun ama chama kilha'a hileh akikouna chu bulhinga adonbut louthei ahi. Ahin Pathen'in akou tolhonin Lhagao thaneina jong apen, hijeh'a chu Ezekiel chun thu amana, 'Lhagao chu kasunga alutnin kajah'a thu aseijin, kakenga eidin sah'e' ti'a ase'i ahi. Hiche kouna hi 'donbutlou theilou kouna (effective calling)' kiti ahi. Pathen'in eikouvun, Lhagao thanei na jala chu akouna chu ijah'uva idonbut theiju, ikenguva idinuva, thilsemthah chu ihijiu, Pathen'in tohdinga eigon peh'u na chu itoh'uva, Pathen kouna chu eiho'a na itohsah'u (effective) ahi.

Pathen kouna chu eihon idonbut uva athu iman tengule bou na atoh (effective) ji ahi. Samuel banga eihon jong akouna chu ijah jinguva ihetlou maitheiju ahi (1 Sam. 3). Ahin akouna chu ihetnuva athu iman pat pat ule huhhinga lampi'a chu kalkhat ison patnu ahi. Paul dingin kouna chu

aw toh meivah to Damascus lampi'a chun ahungin ahi. Thomas Jesu seijui, amasa'a anakou chu athu anamang ahin, hinlah amadinga kouna chun Jesu athokit nunga, a Pakai chu ahing nalaijin, akou jing nalaije ti ahedoh'a "Pakai le Pathen" ti'a akisana bou chu na atoh pat (effective) pan ahi (Jn. 20:26-28).

Pathen mikouna hin phatseh'a Pathen thu isimpetnu, thusei ingaipetnu ahilouleh loile gol hon aseijuva kona phulou helouva na iti ahintoh thei dingham? Hiche hi Lhagao thahatna jala bou hithei ding ahi. Lhagao vah'a kona chu ahina bang banga Christa chu imuthei diu, hiche vah dihtah'a kon ama chu imu tenguleh ama'a ikipeh lut thei dingu ahi. Lhagao Theng beija eiho muthim noiya um ihuvin, ahin avah chu isunguva alut teng Christa eiho toh kimuto dinga hungchu imu theijuva, a'aw chu ijah theiju ahi (Ps. 36:9) – Projector hoitah neijong lechun meivah aumlouleh navet thei lou, meivah jala kon namuthei tobang ahi.

BUNG – 5

LUNGHEI (Repentance)

Lunghei ahiloule kilehei kiti hi Latin paova kon, 'kihei'/'turning' tina ahi. Tekahnan lampi khatna kache'a ahi'a ipi jehham khatna kaki leheija alangkhat joh'a kache tina'a kon kila ahi. Eiho dinga hiche hin thina'a kon ikiheijuva hinna lama ichou tina ahi.

Lunghei lampanga hetding masa pen chu: Pathen joh chu mi kilehei sah/lungheisah ahin, mihema kon ahipoi (Jer. 31:8-20). Loukhoi pa johchu abongchal akiheina dinga akiheisah ahibanga, Pathen johchu lungheina dinga na hintong masa ahi. Hichu Lhagao Thenga kon Pathen'in eihin kou'uva, ama lama eihin heijuva, amalam ingat'uva, chonphatah leh atheng to ikimaito tenguleh; eiho dinga lampi dang umlou; ichonset nao chu hiche chondihtah leh atheng masanga chu ibit'uva ihoidoh theilou dingu ahijeh'a ikisih'uva, ilungu iheiju tailou lampi dang umjilou ahi. Ajehchu Ama chonphatna leh athenna'a kona chu ihinkhou hi ichana chonse ham imu doh'uva, hijeh'a chu ikisih'uva, ilungu iheijuva, lampi chombah'a chonsetna lampi'a kon chonphatna lampi lama ikiheidoh'uva; hichun ipolamu jong apumpi'a ahei ja, masanga adihlou lama imaiju ana kihija kon hinkho thah lama iheidoh jiu ahi.

1. LUNGHEI HI IPIHAM?

Lunghei hi ichonsetna chung a themmo kichana kish maimai ahipoi. Lunghei hi kismphat jong ahipoi. Mitamtah achonsetna chung a kish'a kap kap jeng aumin, akismphat thouvun, ahin alungu ahei pouvin, achonset naova akilehei paikit jiuve. Judas Iscariot le Esau chu achonsetna chung lhona akish lhonin, ahin alung aheilhon poi (Heb. 12:17). Ahin lunghei hi lungkhel tina ahin, hiche lungkhel chun polam jong akhel phah ahi. Mtt. 21:28-32 na'a apan lengpi leija dinga asol chun anaopa chu amasan anompon, ahin anungin alung aheijin, alunggel akhelin ache'in lengpileija chun na agatong'e. Lunghei kiti chu hitobang chu ahin, apolama akiphondoh ngai ahi.

2. LUNGHEI APOIMO DAN

Mijouse hi Pathen mitmu'a themmo chang ahisoh keijin, mijousen alung aheicheh dingu ngai ahi. Lunghei hi tahsan masang ngeija hunglung tei ahin (Mk. 1:15), Lunghei hi Ngaidam chan masang ngeija hunglung (Lk. 24:47), Lunghei hi Kikhelna (conversion) masang ngeija lung ahi (Acts. 3:19). Lunghei hi Pathen thupah ahi (Acts. 17:30). Hijeh chun lungheina beija hi anungjui

tahsan, ngaidam channa leh kikhel umtheilou ahin, penthah chu hithei lou ahi. Hijeh'a chu Lunghei kiti hi Bible'a kimangcha thupi manlutah ahin, jakhat valvei jen akiseije. Hiche hi John Baptist thupi (Mt. 3:1,2), Jesu thupi, Jesun asejui ten jong aga lhangsap le dinguva ahil (Mk. 6:12) chule amahon jong aga lhangsap'u, Penticost jouva jong seijui hon analhangsap le jingu (Acts. 2:38), Solchah Paul dinga jong athupi (Acts. 20:21) ahi. Pathen'in alungsunga apohgih pen chu mijousen alungu ahei dinguh hi ahi (2 Pet. 3:9). Pathen thupeh ahito lhona hiche hi ijuilou, inun louleh aga chu tonsot manthahna ahi (Lk. 13:3).

BUNG – 6

TAHSAN

Tahsan hi Christian te huhhing ichannaoh leh ikibul phunao ahi (Eph. 2:8). Christa leisetna alen laija mihotoh akihoulim leh aboldam jiteng atahsan naochu ave'in, angaicha teijin ahi. Tekahnan: Syrophoenicia numeinu (Mk. 7:26); Sepai jalamkaipa (Mtt.8:8-10); Mitchopa (Mk. 10:51).

Tahsan hi Pathen'a ikingaiju, imon piu (confidence) chu ahin, hichun Athu tahsana aso'in, hiche tahsana jala hi Christa chu ihuhhingpu'a ikisanuva vannoti mihemte henga iseiphongu ahi.

1. TAHSAN HI IPIHAM?

Dictionary'in tahsan hi "ginchat (believe), kingai, kinep, houthu'a kiseiho tahsan, le adang dang ahi" ati. Heb. 11:1 in "kinepna thilho hetchetna, mulou thil aum monge ti photchetna ahi" ati. NT'a tahsan iti teng: achunga kingailhah (rely upon), ama'a beden (adhered to) atina ahijie. Tekahnan, bench/chair chungu itou ding teng igih, ijan vetoh sese'a tija tah'a toulouva ipum piuva eipoh jou tei dinguh, bong pontin, lhuponte ti'a tahsan na neitah'a itou lhah jengu tobang; ito'u phong kang thima kimat louva toulouva chair toh ito'u behchet na itouvu tobang ahi.

Hijeh chun tahsan iti teng ipumpi'a thilkhat/mikhat (Christa) chungu kipehlutna kingailhah'a ama'a bedet chet, ama toh kikhen kanglou tina ahi. Hijeh chun Christiane tahsan hi muthim noiya kikichom tobanga ipi itahsan ham kihelou hilouvin, athu'a kon ihetdoh'u dungjuija Pathen le ahinsol Achapa Christa tahsan ihuvin, achunga iki ngaplah'uva, ama'a ikipehlut uva ingailut uva, athu'a inun uva alungdeidei ibolu chu ahi.

Huhhingna chanathei leuva tahsan tihin, Pakai Jesu Christa chungu ipumpi'a kingailhah, keija boltheina aumpoi ti'a ihinkho, ilungthim, ilhagao leh itahsa apumpi'a nanga (Christa'a) ahin, nangman nadei bangtah'in mangchan ti'a pehdoh'a ama lunglam jeng thumang tah'a bol chu ahi. Hijeh'a chu tahsan iti teng ilunga gela ginchat tho maimai hilouva, Jacob min natoh ahi atichu hiji ahi.

2. TAHSAN THUPI DAN

Tahsan hi thil thupi tah leh poimotah ahin, Heb. 11:6 'in tahsan beija Pathen lung tohoi ahipoi ati. Tahsan na jaolouva chu mutheilou Pathen to kigujiopna umthei lou ahi. Tahsan jala bou chu aum monge ti ihetnuva, mihem tehi khatvei le tohman apehding ahi ti ihetnu ahi. Chuleh tahsan jal bouva hi huhhingna ichan dinguh ahi (Acts. 16:31).

Ahin Huhhing channa dinga tahsan jonghi jatni aume.

i. Luchanga tahsan (Head belief) – tichu Christa ana'um monge ti athusim ho hetna, Bible'a kisun ho pom ahin,

ii. Anina chu Lungchanga tahsan (Heart belief) – lungthim giltah’a kon tahsan, hiche tahsan jala kon anatoh hungpotna chu ahi.

Adamlou khatchun lou/damdoi donding bottle khat aneija, hiche hin mijong ana damsah ahin keijong eidamsah thei ahi ti ahet,(hichu aluchanga atahsan ahin) chubana atahsan jala adon (lungchang tahsan) na, adon jala dam tobang ahi.

Itahsan’u hi Christa ahiding ngai ahi. Kimkhatnin atahsan na chu atahsan jiuvin ahi (faith on Christ, not faith on our own faith). Hetna mai mai leh ginchat maimai chu tahsan ahipoi. Tahsan dihtah chun atahsan pa nung ajui teije. Hijehchun tahsan hi ilhagao vin Christa lam ajotna Christa apoma akisan chu ahi (Jn. 1:12; Col. 2:6).

3. TAHSAN HUNGKON DOHNA

Akhatna’a tahsan jonghi eiho’a boltheina’a kon hilouvin Pathen’a kon Pathen’in eipeh’u joh ahijon, Trinity natoh ahi.

- i. Pa Pathen’a kon ahi (Rom. 12:3; 1 Cor. 12:9).
- ii. Chapa Pathen’a kon ahi (Heb. 12:2; Luke. 17:5).
- iii. Lhagao Thenga kon ahi (Gal. 5:22).

Aninan Tahsan hi eiho lama kon ngaichatna le boltheina jong angaije. Hichu Rom. 10:17 na’a tahsan hi thujah, Pathen thujah’a kon ahi. Bible hi isimuva, Pathen thu kiseiho hi ingaiji tengule itahsan naohi hatcheh cheh ji ahi. Acts. 4:4’a “miho chun Pathen thu kisei chu angaijun atahsahnu” akiti. Tahsana inei theina dinguleh tahsan na’a ihat cheh cheh theina dinguva Pathen thuhi ingai jinguva isim jingu ngai ahi. Chugoh hilouvin, Mk.9:24 na’a “Pakai katahsane, katahsan lelina’a neihun” ti’a Lhagaoboh voppa chapa atao banga eiho jong ichonsetnao iphonuva Pathen henga itaovuva, tahsanna chu inei dinguh ahi ,(cf. Lk. 17:5). Hijeh’a chu Jesun Mtt. 17:19-21 na’a tahsan vanga lhagao boh chu nodoh ding hijongleh, hiche tahsan na neina dinga chu an’ngol taona angaije ti’a aseih ahi.

4. TAHSAN JEH’A AGA HUNGSOHDOH

Tahsan hi pannabei hilou ahi. Mihem khatchun tahsanna ahin nei jala:

- i. Tahsan jala huhinga umji ihuive. Gen. 15:6 na’a Abraham’in Pathen chu atahsanin, hiche atahsanna chu ama dinga chonphatna’a kisim peh ahi (cf. Rom. 4:3).
- ii. Christa chu tahsan jala bou ikisanu ahi (Jn. 1:12).
- iii. Tahsan jala chonpha’a sim ihu ahi (Rom. 5:1).
- iv. Tahsan jala Pathen chate ihi theiju ahi (Gal. 3:26).
- v. Tahsan jala soptheng (sanctified) ihu ahi (Acts. 26:18).
- vi. Tahsan jala kingah (kept) ihuive (1 Pet. 1:5).
- vii. Tahsan jala cholngana’a puilut ihuive (Heb. 4:3).
- viii. Hebrai bung 11 na’a kiseijou se hi tahsan jala bou hithei ahi.
- ix. Tonsotna ilhuna dinguh leh ichan dinguh chu tahsana’in aphotchet dinguh ahi. Tahsan vanga huhinga iumuva tonsotna Christa toh vangama iumdinguh, tahsan jal mama’a tonsot thina chang dinga damuna selut ihi dinguh ahi.

BUNG – 7
PENTHAH
(New Birth or Regeneration)

1. PENTHAH

Avela penkit ahiloule thah penkit, anivei channa'a pen, semthah seinah ahi. Pentahna hi Lhagao Theng natos ahin, Aman mihem sunga hinna thah apeh'a, chuteng ama chu 'thilsemthah' or 'mihem thah' ti'a kikou ahi. Pen masat pa chu phat lutna oltah'a hung kipenga ahibanga ichonsetna ikimudoh'a ikihetdoh (conviction of sins) 'apatna pentah kah hi nikho tamtah, hapta, lha le kum lutthei ahi. Ahin penlahna chu minute khat kahsung ahin, mihem chu muthima kon vah'a alutna pentahna jong chutima ahi. Athah'a apen kit theina dinga mihemchu khatvei athi ngai ahi. Atahsa chu thiding hilouva, Adam'a kon ahin neison chonsetna, amilui chonset po tahsa pum leh lungthim jouse chu Christa thina thingpela chu ikhetbeh tha'uva, athina'a chu ithi sah'uva, athokitna'a chu chonphatna lama itho kitnu chu pentahna ahi.

2. PENTHAHNA HI KOIHO'A DINGHAM?

Nicodemus banga mipha hoding bouham? Paul banga miphalouho'a ding bouham? Bible'in kichen tah'in pentahna hi mijouse'a ding ahi tin aseijin (Jn. 3:3,7), hiche hi ateh, akhang, ahao, avai jouse dinga angaikhoh pen ahi. Pentah khelding (substitute) ima aumpon, pentah louchu manna ahi. Mihem khatchu thilsem thah ahi theina dinga apentah ngai ahi (Gal.6:15 cf. Jer. 13:23). Achuti louleh mihem lungthimhi thenlouna leh gitlouna ngen ahin, Pathen'in bou hichu pentah vanga asuhtheng thei ahi. Pathen chu atheng ahin, atheng ahijeh'a mihem khat a'angsunga themchang le atheng ahi theina dinga apentah ngai ahi (Heb. 12:14).

3. PENTHAH NA DINGA NATONG

Pentahna dinga natong chu Pathen thu ahi (Jacob.1:18; 1 Pet. 1:23). Tulai Pathen thuseihon ijat aseivanguva mi tamtah apentah theilou nao hi tulai thusei ho thupi'a hi Pathen thu alhahsam le aha jaolou jeh ahi. Pathen thu hi mihem lungthim leh lhagao tongkhathei le tahsana lama puithei chu ahi.

Anina'a Pentahna dinga natonga chu Lhagao Theng ahi (John. 3:5,6,8). Pathen thu kiseiho goh leh twigoh hilouva lhagaova pentah ngai ahi. Chuleh pentahna jong hi mihem lama kon kipan louva Pathen lama kon hungkipan ahi (Jn. 1:1; James. 1:18). Ahin mihemte mopohna chu Jesu Christa ihuhhingpu dinguva ikisan dingu chu ahi (John. 1:12, 1 Pet. 1:25).

Pentahna hingongdoh'a chu Pathen ahin, Pentah na lampi chu Christa ahin, Pentah sah'a chu Lhagao Theng ahi. Pentah theina dinga alampipi chu Pathen thu itahsan jaluva Christa ikisan vanguva kon ahi.

Chuleh mihemkhat chu ahung pentah teng apolama mutheijin ahung kilangdoh teijin ahi.

- i. Miphengthah dih tahchun chonphatna hinkho amangteijin ahi (1 Jn.2:29).
- ii. Chonsetna'a ahing jingpon ahi (1 Jn. 3:9; Jn. 5:18).
- iii. Ngailut dinga thupeh chu ajui teijin ahi (Lk.10:27; 1 Jn. 4:7).
- iv. Galjona (leiset chonsetna galjona) hinkho anei teijin ahi (1 Jn. 5:4).

v. Mi pengthah chun Jesu chu Christa ahi ti atahsan teijin ahi (1 Jn.5:1).

Achung chona mipengthah hinkho leh lungthim chu akikhelin; Chonset chu aho'in, Christa chu angailun ahi. Hinkho thah leh thenna hinkho chu sunga kon hintwiput banga hungput doh dingin angaichan, midang ngailutna leh thilphabol hinkho ama'a kon chun alongdoh teijin ahi (Jn. 4:14; 7:38).

BUNG – 8

NGAIDAM CHAN (Forgiveness)

Chonsetna jeh'a mihemte chung a Pathen lunghan na chu'a ahitan, hiche jeh'a hi vangam jengjong lut louding ihi taove. Ajeh chu vangam chu atheng ahin, boh kiti lutthei lou ahi. Ahin vangam luttheina dinga lampi khat umsun chu Pathen'in eingaidam vanguva kon bou hiding ahi.

Old Testament na ngaidam chung changa hin thucheng thupi tah thum akimang chan ahi. Akhatna chu, 'Khukhum (to cover) ahin, anina 'dopmang/chonmang (to lift away)' chuleh athumna chu 'solmang (send away)' ahi. New testament'a ngaidam kiti hin chonse khat chu Christa lhatdamna natoh jala kon leh ngailut jalseh bouva achonset na'a kon aki chomkhen doh tina ahi.

1. NGAIDAM HUNGKON DOHNA

Chonset ngaidamna hi Pathen'a kon bou ahi. Michonse chun Pathen dan thupeh chu apalkeh ahijala chu apalkeh pa hilou, danthu pepa Pathen'in bou ngaidam achanthei ahi. Pathen danthu palkeh ihi tah jeh'uva Pathen'in bou ngaidam eichan theiju ahin, midangin ngaidam eichan thei louvu ahi. Hijeh'a chu Judaho chun tahsa'a um Jesun ngaidam anachan chu ahethi louhelu ahi (Lk. 7:49; Mk. 2:7). Ahin Jesu amatah Pathen hi'a chun akoma ngaidam ithumu leh ngaidam eichan theiju ahi (1 Jn. 1:9 cf. Acts. 5:31).

2. NGAIDAM HUNGKON NALE AKIBULPHUNA

- a. Ngaidamna hi Pathen milungsetna jala kon ahi (Ps. 78:38.)
- b. Ngaidam na hi Pathen thutan dihtah jala bou kichang thei ahi (1 Jn. 1:9)
- c. Ngaidam na hi Christa thisan jala bou kichang ahi (Eph. 1:7. Ajehchu chonset man thina ahin (Ezk. 18:4; Gen. 2:17), chonset ngaidam channa dinga chu thisan kiso teiding chu Pathen thupeh ahin, boljong anakibol ahi (Gen. 3:21; Gen. 4:3-5; Lev. 17:11).

3. NGAIDAM CHANNA DING LAMPI

- a. **Lunghei** (Acts 5:31): lunghei hi ngaidam chan masang hitei teiding ahin, chuleh lunghei hin chonset na'a kon Pathen lama hungkihei aseina ahi (Acts. 2:38; Lk. 7:36-50).
- b. Tahsan (Luke. 7:50).
- c. Phondoh/confess (1 Jn. 1:9), Chonsetna phonding (cf. Ps. 32:5)
- d. Midang ngaidam ding (Mtt. 6:15, Lk. 6:37; Eph. 4:32).

Pathen mingaidam na abulhin danchu: Pathen'in mihemkhat chu ngaidam achan teng akehkhat ahiloule 4/1 hilouvin, abona angaidam ji ahi (Lk. 7:47; Ps. 103:3; Ps. 32:1,2; Col.2:13; Mtt. 12:31).

Mipengthah leh ngaidam changsa khatchu chonsetna'a akilebol kitding chu angai ahitapoi (Rom. 6:1,2), ajeh chu lunghei kiti hin chonset nungsun le avela bolkit tahlou ding aseina ahi. Ahin mihem chu leiset chonset hatna gama leng ihi nahlai jeh'un, hetlou kah, het jenga jong chonset hi kibol teitei ji nalai ahi. Hijeh'a chu mihem khat chun achonsetna hi Pathen henga aphon jinga, ngaidam chanding angeh jing ngai ahi. Peter'in ijatvei ngaidam chan dingham ti chung changa Jesu thu adoh chun Jesun sagi mun somsagi vei; tichu avel vela ngaidam chanding ahi tin adonbutnin; chubanga chu eiho jong Pathen henga ngaidam thumjing ding, chuteng leh Pathen'in avel vela ngaidam eichan jing dingu ahi.

BUNG – 9

CHONPHAT CHAN (Justification)

Tulai mitam tah'in chonphat chan hi ngaidam chantoh kibangin aseijun, ahin chonphat chan hi ngaidam chan sanga chungnung jo; chonphat chan chu chonpha ahi ti'a phondohna ahi. Chonphat chan iti teng Pathen'in chonse khat chonpha ahi ti'a asim, ahi'a achonset na chu chonphat ahi atina hideh lou ahi. Ajehchu chonset chu Pathen dinga thet umtah ahin, chonset chung dan thu leh chonphatna danin angeh chu thina ahi (Ezk. 18:4; Deut. 25:1; Ex. 23:7; Isai. 5:22-23; Lk. 16:15; Rom. 2:13; 3:23). Ahin hichehi thil het hah tah, Pathen milungsetna vang bou ahin, Jesun amaleh ama kiphaltah'a mihem lim le mel ahungputna, danthun angeh mihem hiding bangtah'a ahung hinna, chonphatna chu changa hiche chonphatna chu mihemte atahsan jouse chu thilpeh banga apeh'a achan sah ahi.

Chonphat chan tihin, Pathen angunga chonpha ti'a sim, michonse khat chun Chirsta chonphatna chu akivona, Pathen'in ahinvet leh Christa chonphatna akivon jala chu chonpha'a amu tina ahi. Michonse khat chun Huhhingpu akivon tah jala chu kidangtah'a Christa sunga chu achonsetna chu kisela (hichu Christan athipi), Pathen'in Christa chonphatna johchu ama'a chu amu ahi. Hijeh'a chu chonpha'a sim ahilouleh chonphat chan (Justification) tihi Court thucheng, court natoh (judicial word and act) ahin, tahsan jala Christa kivon jouse chu Pathen'in amitmu'a chonpha ahi tia asim, themmo na jouse leh gotna achunga lhunding jouse'a kon a'ongthol tai ti'a aphondoh ahi (Rom. 4:3; 4:5).

Pathen hi chonpha ahin, ama'a chu chonset behlou, chonset na kipah lou ahin, chuleh ama angung lhun theiding le ama'a hitheina dinga alampi khatseh umsun chu ama banga chonpha hiding hi ahi. Ahin mijouse chu Adam chonsetna jeh'a chonse'a kisim ahigam tan, mijouse chu chonse ahitai (Rom. 3:23); chonpha koima'a aumtapoi (Rom. 3:10). Michonse chun Pathen mai amu ngai louhel ding ahitan, chonset man thina chu mijouse chung lhung ahitai. Mihem dinga Pathen san ihi theina dinguva lampi khat sehseh umchu Chonphat vang ahin, mihem koima chonpha aumtah louto lhona, chonset man thina chang ding ho jouse khela Jesu Christa chu hungthi'a mihemte chonsetna jouse chu achunga apoh'a thi'a ahitan; koihileh Christa tahsan jouse chu achonset najouse Christan athipi ahitah jeh'a kingaidama ahitai. Christa atahsan jala chu Christa chonphatna jouse chu amachu changa ahin, Pathen mitmu'a achonsetna chu doh talouva Christa chonphatna johchu ado tahjeh'a chu Chonpha ti'a kisima, Pathen lunglhaina chu changa ahi.

Mihemkhat chu chonpha'a sim ahitheina dinga Christa chu atahsana, Christa thina'a chun chonsetna thi kahitai; Christa thi chu keima jeh'a thi maimai hilou, keima dinga thi maimai hilou: Athina'a chu keimatah chonsetna thi kahin, akivui na'a chu kachonsetna jouse kivuimanga ahitan, athokit banga chonsetna hing talouva chonphat na'a hing ding kahitai ti'a kipeh lutna; akipeh lutna chu Baptize channa aphotchet jal ahi. Hiche ikipeh lut chu Tahsan'a kisima, hiche tahsan jala chu chonpha ti'a sim kiji ahi (Rom. 6:1-14).

1. CHONPHAT CHAN'A JAO THIL THUPI TAH NI

i. Chonset kingaidam leh athemmona leh gotna achanding kilahmang. Pathen thengtah le chonpha tah dinga chonsetna gah ngaidam ding kiti hi thil neocha ahipoi. Ahin thutah chu Pathen hi chonset ngaidam leh themmona soptheng hi akipana le alunglam ahi (Micah. 7:18,19).

Chonphat channa'a hi ichonset nao hi kingaidama, themmona leh jepna jouse hi kilamanga ahi (Acts. 13:38,39).

ii. Christa chonphatna eima'a akihetlut (imputation of Christ righteousness). Ngaidamna kiti hi mikhat songkul la um, aumding phat akichai phatna gimbolna'a kon kilhadoh, ahi'a gammi hina (rights of citizenship) nei dehlou tobang ahipoi. Christa'a kon chonset ngaidamna kiti hin themmo najouse jong ngaidam chang ahina bana gammi hina jong kichanga ahi (Rom. 3:22). Chonset ngaidamna ichan nachunga van mi hina leh amatoh tonsotna umkhomna dinga chanvou kinei ahin, Christa'a chamkimkei, chonphatna thengset chu eima'a kibunglutna kichanga ahi.

Ahin hiche chonphatna channa dinga alampi umsun chu Pakai Jesu Christa tahsana ihuhhingpu'a kisan ding hi ahi (Gal. 2:16; Rom. 3:26; 4:5).

2. CHONPHAT CHANNA HUNGKON DOHNA (means):

i. **Pathen vang**: Pathen hi conphat chan gongdoh (author) leh podoh (donor) ahi (Rom. 8:33). Chonphat chan hi Pathen hatchungnung natoh ahi.

ii. **Lungset vang**: Lungset (grace) hi chonphat channa dinga abulpi pen ahi (Rom. 3:24; Tit. 3:7)

iii. **Thisan vang**: Thisan, Christa Thisan hi chonphat channa kifulphuna ahi (Rom. 5:9).

iv. **Thokitna vang**: Thokitna hi chonphatchan hetdohna le phondohna ahi (Rom. 4:25).

3. CHONPHATCHAN KIPHOTCHETNA (Evedence) – NATOH.

Chonphat chan dihtah chu akilah dohna/aphot chetna khatbou aumin, hichu natoh pha ahi. Tahsan chu chonphat channa dinga alampi ahin, natoh hi chonphat channa ga/akiphondohna ahi. Koihileh tahsan vanga chonphat changa chun anatoh'a apondoh, akilah dohsah teitei ding ahi. Abraham chu anatoh vanga chonpha'a kisim ahi atihin, Abraham'in Pathen chu atahsan na atahsan na chu natoh'a apohdoh jala chu, hichu amadinga chonphatna'a kisim peh ahi (Jacob. 2:21-23). Hijeh'a chu tahsan leh natoh hi kinai mama ahi. Tahsan vanga chu chonpha'a sim ihieve, ahin chonpha'a sim ihijou tengu leh chonphat hinkho chu imanun gai tei ahin, ana toh'a chonphatna hinkho neilou chu atahsan na jong moh le athisa ahin, chonphat jong chang loulai tina ahi. Chonphat changkhat chun anatoh'a aphotchet teitei ding ahi. Hichehi theology paova Sanctification (thenna hinkho) akiti.

THENNA/SUHTHENGNA (Sanctification)

Hiche hi thupi thupitah ahi. Heb. 12:14 nan, 'mijouse toh kichamdel'a umna le thenna chu dellun, hiche thenna tailouva chu koiman Pakai chu amulou ding ahi' ati. Hijeh chun thenna hiN chonphatna hinkho avetsah ahi. Eiho jong atheng (sanctified) ihu ngai ahi, ajehchu eihuhhing pau chu atheng (sanctified) hija ahin, amachu:

- i. Pa'a kon suhthengna chang (Jn. 10:36)
- ii. Ama le ama kisutheng (Jn. 17:19)
- iii. Amiten asuhthengu ahi (1 Pet. 3:15).

Thenna (sanctification) hi tahsan jouse dinga Pathen lungdei chu hija ahi (1 Thess. 4:3). Hiche thu hi Bible sunga 1066 vei akimui ahi.

1. THENNA/SUHTHENGNA KITIHI

Lhagao Theng natoh ahin; suhthengna leh thenna kitihin aseina kibang tobang ahin, akoudoh akikhe'e. Ps. 4:3, Pakaijin Ama'a ding mongmonga achomkhen, atina khu hiche suhthengna hi ahi. Tahsanho chu Pathen'in amanchah dinga achomkhen ahi. Bible dungjuja suhthengna hi chomkhen, hichu: 1. Pathen'in achomkhen, 2. Pathen'a dinga kichomkhen, 3. Chonsetna kon kichomkhen, Hinkho thenga dinga kichomkhen (Heb. 12:14) ahi. 2 Tim. 2:21 nan, 'Hichenga kon kithensodoh chu ama chu sahlut doltah ahi, akisutheng ahin, Pakai natonga lomtah ahin, chuleh thilpha bolna ding jouse'a dinga kigosa ahi' ati.

Bible'a houbuh chuleh asunga manchah jouse akisutheng: Mihem jouse, a'in, Alou, apengmasa, houin, thempuho leh nampumpi akisutheng akimui (Ex. 40:9-11; Lev. 27:14-16; Num. 8:17).

Ahin tahsan ho dingin hiche hin koudoh ni aneije.

- i. Chonsetna kon kichomkhen (2 Chr. 29:5; 15-18)
- ii. Pathen'a dinga kichomkhen doh (Lev. 27:16).

2. SUHTHENGNA HUNGKONDOHNA

- i. Pa Pathen'a kon (1 Thess. 5:23,24)
- ii. Chapa Pathena kon (Eph. 5:26)
- iii. Lhagao Thenga kon (2 Thess. 2:13).

3. SUHTHENGNA LAMPI (means of sanctification)

Suhthenga iti i'umu ham?

i. **Pathen thu'a kon** (Jn. 17:17). Suhthenga umna dinga Pathen thu simjing angaijin ahi. Ajehchu Pathen thu hin asuthengin asophthengin ahi. Hiche Pathen thu hi chonset phongdoh ahi. NT sunga hin 21 vei chonset kigollha akimun, agommin 121 alhingin, achomchek 103 aumin ahi.

ii. **Thisan jala** (Heb. 13:12). Pathen thu hin chonset aphongdoh'in, thisan in asophthengin, hiche'a kon asohdoh chu sop/suhthengna ahi.

iii. **Jepna chan** (chastisement) na kon (Heb. 12:10,11). Tahsan chate chu asuhkhelu aumteng mipa khatnin acha suhdih nadinga jepna achan bangin Pathen'in jepna achanjin, hiche'a kona chu suhthengna asohdoh ji ahi.

iv. **Pathen lamma kipehlut jeh** (Rom. 6:19). Pathen'a kipehlut hin thenna leh suhthengna asoi.

v. **Eiho le ei** (2 Cor. 7:1). Suhthengna chungna hin eihon jong mopohna ineijun; hichu ichonsetnao iholdoh'uva, ipailhah'uva, suhthengna dinga itovuva, thenna hinkho'a ihin theina dinguva Pathen henga thahatna thumma itao uva, thenna hinkho imanua ngai ahi.

Niseh'a hi Christa chu suhthenga i'umnao ahi ti sumil louva ium jingdiu, nisimseh'a athenna, tahsan aumna, angailutna leh alungsetna chu ichanjing dingu ahi. Niseh'a thenna hinkho manna dinga thuguh chu Christa thenna chu ihetjingu va hichu eihon jong ineijing dingu chu ahi.

4. SUHTHENGA I'UM PHATNU (Time of sanctification)

Hiche chungchanga hin lunggel jatchom chom cheh aumin ahi. Kimkhatnin hiche hi Christa tahsanna ineijuva chu chamkim ahitai atin, Christa lama ikepehlut le penthah toh kibangin agelun ahi. Ahin kimkhatnin lungsetna natoh ani channa ahi atin; Penthahna toh kibang louhel achombeh ahi atiuvin; kimkhat kitnin suhthengna hi apetpetna lhung leh ol ola chamkim ahi atiuve.

Eiho tahsan dungjuijin hiche hi apetpetna lhungleh ol ola guilhung khatvei leh chamkim ding ahi.

i. **Penthah thah'a guilhung ahi** (1 Cor. 6:11). Suhthengna hi achesa ihinkho'uva thillhung ahi, hichu ichonsetnao akisop lhah'a chonphat eikichanna chu guilhung ahi. Ahin,

ii. **Ol ola guilhung toutou ahi** (Jacob. 1:22-25). Hilai muna phatvet hi Pathen thu ahin, hichun chonsetna aphondoh/amudohsah'a, hiche chonsetna chu phondoh (confess) jing ngai ahi. Lhagao Thengin Christian hinkho to banglouva ihinkho manu chu khatveijin aphongdoh pon ahi. Ajehchu hichu lunglah nathei hiding ahi. Hijeh'a chu ol'ola ichonsetnao chu hungkilang kiphong doh doh'a hichu aphas phatcha kikisuhtheng ji ahin, suhthengna hi oltah'a guilhung lhung ahi. Hijeh'a chu mihem khatchun Pathen henga nisim seh'a achonsetna aphon jinga, chonsetna kon akikangse jing ngai ahi. Hiti'a chu ahung che che tengleh,

iii. **Akhonna leh chamkimna bulhing ding ahi** (1 Thess.. 5:23). Nikhatleh eiho bulhinlel na beihela chamkim tah'a ithen dingu ahi. Hiche hi Christa ahunga itahsao hi akikhela ahiteng chamkim ding ahi. Hiteng chuleh eiho ama bang bang ihi dingu ahi (1 Jn. 3:2; Phil. 3:12-14).

5. SOPHENGNA UMJEH'A AGA (Result of sanctification)

i. Christa jala chamkimna (Heb. 10:14)

ii. Thenna ga kinei, (Rom. 6:22).

Nalhagaovin thenna angai chatnam? Suhthengna angai chatnam? Christa bang hiding angai chatnam? Pathen chapa banga hiding angai chatnam? Chuti ahileh nachonsetna Ama henga phongin, chuteng nangaichat leh alungdei chun nalhagao ngaichatna thuhtah chu asuhbulhit ding ahi. Suhthenga umna dinga aman thupi pen chu Chonsetna leh thenlouna jouse'a kon kikangse ding hi ahi.

6. SOPHENGNA LAMPI'A CHU ITI ICHEJING THEI DINGU HAM?

i. Lhagao Theng mapuina lampi avah le adih lama chu chejing ding, athu nunjing ding ahi.

ii. Hiche'a chu lolhin lelina naneileh Pathen koma nadihlouna chu phongin, chutileh aman apet petna nasuhtheng ding ahi.

iii. Diabol chu kidoupin lang mun ot hih'in, chuti leh nanga konnin jamtante (Jacob. 4:7).

iv. Phatseh'a Bible sim, taona leh hettosahna, midang dinga hin na lama pontho tah'in tanglouvin pangjing'in.

BUNG – 11

ADOPTION (Cha'a sem)

Penthah hi mihem khat khat lhagaova avela ahung penthah na ahin neiteng kipan ahin; Chonphatchan hi Pathen'in hiche mihempa/nu hinkho le lhagao umchan to kisaija anatoh ahin; Cha'a sem hi Pathen'insung mi a kisimna leh cha hina chan ahi.

Adoption (cha'a sem) kiti hi Greek thuchenga kon kiladoh, "Chapa dinmuna koi/chapa chu adinmun dinga koi (the placing of a son)" tina ahi (cf. Rom. 8:15; Eph. 1:5). NT phatlai chun hiche thucheng hin seinia ni aneije:

- i. Changtum tah'a midang icha hiloukhat chapa'a sem.
- ii. Lhangphong'a chapa chu goulo ding ahiti'a japi hetna phondoh. Hiche kin hi akibol kah'a chu chapa chu insung soh ho toh kibah louna neocha bou anei ahi.

Hiche thucheng hin Pathen toh ikiguijop nao hilouva, Pathen angunga idinmunu joh aseina ahi. Cha'a sem/sim hi Pathen natoh, tahsan vanga chonphat chang ho chu chapa pilhing ahitai tia adinmunu le amopohnau chanvou achan na ahi. Tekahnan Mose chu Pharao chanu'in chapa'a akisem ahin, hiche chungu dinmun leh mopohna jouse chu ahung pilhin toh kitoh'a changa ahi (Ex. 2); Ahin Mosen hicheho chu akum ahunglhin toh lhonin chan ding ada'e akiti (Heb. 11:24). Cha'a sim hi Chrita'a ikhanletnao leh dinmun thah channa ahi. Hiche'a hin thudoh thupitah ngaito ding aume.

- i. Hiche hi ipenthah thah'a chu kichang paiham?
- ii. Cha'a sem khat chu achanding gou kilahpeh'a kipaidoh kit theijam?

Cha'a sim hitheina ding hin lampi khat sehseh bou aumin hichu; Christa tahsan jala ama'a uma, ama toh pumkhat hina'a kon bou hithei ahi (Gal. 3:26).

1. CHA'A SIM PHAT (time of adoption)

i. Vannoi leiset kisem masanga pat Pathen'in anagon masat ahitai (Rom. 9:11). Hijehchun cha'a sim hi Pathen milungsetna natoh ahin, Pathen mihepina louva chu hiche hi changthei ihi pouve. Ajehchu eiho Pathen lungsetna chang dinga lom jong ihilouvu ahitai.

ii. Mihem khatnin Jesu Christa atahsan sanleh hiche hi guilhung/lhung ji ahi (1 Jn. 3:2). Mikhat chun Christa tahsanna aneiteng "Keima Leng cha kahi, asoh hilou, achapa, agouloding kahi" ti'a dihtah'a seitheina anei ahi.

iii. Cha'a sim hi thokit, Pathen umna mun ilhun tenguleh chamkim ding ahi (Rom. 8:23). Tu dinmunna hi Pathen cha'a jong koiman eihetlou dingu, jalhang lah jenga jong paidoh le thetbola

ium dinguh ahi. Hiche nikho chuleh idinmun dihtah' u chu ichan dinguh ahin, hiche ileiset vouvu hi ipaidoh' uva vou thahle tahsa thah inei dinguh ahi.

2. CHA'A SIM KIHETNA

Cha'a sim ihu ihet theina dinguh lampi chu Lhagao Theng mapuina jala kon hiding (Rom. 8:14) ahin, chuleh aphotchetna jong hiding ahi. Lhagao puihoina leh lamkaina chu ichan louvu leh vang cha'a sim ihi louvu ahin, Pathen cha hina changloulai, jaocha hinalai ihuive. Ahin mihem chu Pathen cha'a sim ihiteng Lhagao Theng jala chu Pathen jong chu "Abba, Pa" ti'a kikou ahi (Rom. 8:15; Gal. 4:6). Jesun Gethsemane'a ataochun, "Abba, Pa" atin, hiche thucheng hi kingailutna chungnung leh kiguijopna naipen thucheng ahi. Hijeh'a chu langkhatna sei dinga eiho hi Pathen'in Christa toh goulokhom dinga cha'a eisimu ahin, Christa sopi ho ihuvin, Ama chu i' uipao ahin, eiho asopite ihuive.

3. CHA'A SIM APHATCHOMNA

- i. Pathen lungsetna changho chu ihuive (Jn. 17:23).
- ii. Pathen, Pa puihoina (care) changa ihuive (Lk. 12:27-33).
- iii. Insungmi hi na 'min' changa ihuive (1 Jn. 3:1); hichu Pathen chate tia minvo ihuhi ahi.
- iv. Insungmi limle mel changa ihuive (Rom. 8:29)
- v. Insungmi ngailutna changa ihuive (1 Jn. 3:14)
- vi. Cha hina lhagao changa ihuive (Rom. 8:15)
- vii. Insungmi kiloikhomna'a jao ihuive (Jn. 14:23)
- viii. Pa'a kon phatna dinga jepna ichang jiuve (Heb. 12:5-11)
- ix. Pa'a kon lhamona ichang jiuve (2 Cor. 1:4).
- x. Pa'a kon gou changding hiuve (I Pet. 1:4).

BUNG – 12

MIHEM KHATNIN CHRISTA AHIN TAHSAN TENG ITI'AM

Theologian tamtah'in chonse khatnin Christa ahin kisan san leh thil 38 apet petnin asoh'e atiuvin, ahin aman achonset akingaidam, lungmonna anei leh kipana anei tilou adang akihet louthei ahi.

2. PA PATHEN TOH KISAIJA

- i. Pathen lungsetna angsung kilhung (Eph. 2:18)
- ii. Pathen'insunga dinga cha'a sim (Gal. 4:5)
- iii. Gou lo ding kinei (Acts. 26:18)
- iv. Lhen kihi (elected) (1 Pet. 1:2); Pathen hetmasat dungjuija lhen jong kihi.
- v. Pathen cha hina chang (Jn. 1:12; 1 Jn. 3:1)
- vi. Vanmi hina chang (heavenly citizenship) (Phil. 3:20)

- vii. Pathen goulo ding kihi (heir of God); (Rom. 8:17; Gal. 3:29)
- viii. Semthah kihi (2 Cor. 5:17)
- ix. Pathen soh kihi (Rom. 6:22)
- x. Pathen thempu hina kichang (1 Pet. 2:9)
- xi. Pathen toh kikicham /reconciled (Rom. 5:10)
- xii. Suhtheng (sanctified) kihi (I Cor. 6:11; Acts. 26:18).

2. CHAPA PATHEN TOH KISAIJA

- i. Alungsetna kichang (Eph. 1:6)
- ii. Amatahsa sunga kiki baptized (baptized in Him) - 1 Cor. 12:13; Gal. 3:27.
- iii. Ama toh kikivuitha (Rom. 6:4)
- iv. Pa'a kon Chapa dinga ngailut thilpeh'a eikipe (Jn. 17:9)
- v. Christa huhhing kihi (Acts. 16:31)
- vi. Christa chenna kihi/Christa eija cheng (Rev. 3:20; Jn. 14:23)
- vii. Tonsot hinna kinei (Jn. 10:28)
- viii. Lungmonna, chamna kinei (Jn. 14:27; Phil. 4:7)
- ix. Pathen loile gol kihi (Jn. 15:15)
- x. Vangamma imin kikhumlut (Lk. 10:20; Phil. 4:3; Rev. 13:8)
- xi. Vangamma Christa toh toukhom (Eph. 2:6)
- xii. Kinepna nunmom kichang (Tit. 2:13)
- xiii. Trinity toh kiloikhomna kinei (1 Jn. 1:3)
- xiv. Pa henga chenna innom chu eija hi (Jn. 14:2)

3. LHAGAO THENG TO KISAIJA

- i. Penthah/thahpen (Jn. 3:3,7; 3:5; 1 Pet. 1:23)
- ii. Lhagao Thengin thao einu (1 Jn. 2:27; Jn. 14:26; 16:13)
- iii. Lhagao Theng chenna in kihi (1 Cor. 6:19)
- iv. Lhagao Thengin lhagao thilpeh eipeh (1 Cor. 12:11)
- v. Lhagao Thengin eichen khum (Rom. 8:16)
- vi. Lhagao Thengin mahor einamkhum (Eph. 1:13)

4. CHONSET TOH KISAI

- i. Ngaidam kihi (Lk. 7:47,48; Eph. 1:7)
- ii. Chonphat kichang (Rom. 5:1; 4:5)
- iii. Lhatdam chang kihi (Rev. 5:9; 1 Pet. 1:18,19).

5. SATAN TOH KISAI

- i. Christa chu ipalaiju/ichungthu'u sei (advocate) hi (1 Jn. 2:1)

ii. Chonset chungu galjona kinei (Jn. 5:4)

6. MIDANG TO KISAI

Palai kihi (2 Cor. 5:20).